

海

國

圖

志

海國圖志目錄

卷之十四

國地總論上

釋五大洲
釋昆侖

卷七十五

國地總論中

利瑪竇圖說
艾儒略圖說

卷七十六

國地總論下

南懷仁圖說
莊廷勇圖說

卷七十七

籌海總論上

陳氏沿海形勢錄
張氏澳門形勢篇

卷七十八

籌海總論中

蕭氏粵東市舶
五論粵東章奏

卷七十九

籌海總論下

浙粵章
奏條約

卷八十

夷情備采一

澳門
月報

卷八十一

夷情備采二

華事夷言
西洋律例

貿易通志

海國圖志卷七十四

國地總論上

原無
今補

邵陽魏源譌

釋五大洲

梵典分大地為四大洲西洋圖說得其二焉而強割為

五為四考萬歷中利馬竇所繪萬國地圖及 國朝

南懷仁之坤輿圖說與天啟中艾儒略之職方外紀圖

皆以地為圓體故分前後二圖其一南抵五印度海北

至鄂羅斯冰海東盡日本朝鮮西兼蔥嶺以西是為中

國阿細亞洲一作亞細亞
一作阿西阿其西北之歐羅巴洲西南之

利未亞洲則皆以地中海爲界地中海以北爲歐羅巴

洲南抵地中海北負冰海廣萬有千二百五十里長二萬三千里地中海以南爲利未

亞洲北起地中海南至大浪山海廣十度東西長七十八度兩洲之西皆盡西洋

大海兩洲之東則皆與阿細亞洲相連利未亞之東則

以西紅海與阿細亞洲爲界歐羅巴洲之東則以阿被

河及北高海與阿細亞洲爲界此第一圖也又有南墨

利加洲北墨利加洲墨利加今譯爲米利堅二洲一峽相連中分

南北其地東南相距百有八十度南洲南北四十二度

北洲如之此第二圖也圖中諸國風俗物產疆域氣候

瓜區豆剖指掌畫沙質諸閩粵互市之番舶重譯獻琛
之貢使事多徵實語非鑿空似可以盡富媼之形勢窮
四洲之方位然以說徵圖實止二洲無所謂四五也說
文水中可居曰州其誼蓋起於洪水以前及降邱宅土
以後因而不改後世偏旁加水爲洲故鄒衍談天則裨
海所環曰神州釋典論地則鹹海所畫爲四洲是洲者
四面皆水之名未可以陸地所通區爲渚嶼之國今歐
羅巴利未亞之山皆發脈蔥嶺邈迤而盡於西海是卽
以蔥嶺東西畫爲二洲尙不可況於蔥嶺迤西之地強

指一河一泊爲界而職方外紀之阿細亞與歐羅巴二圖一則界以大乃河一則界以阿被河此二河者一在裏海之西一在蔥嶺之東相去二十餘度計五千餘里循前圖大乃河則西侵歐羅巴之界依後圖阿被河則東侵阿細亞之界究竟此二河中五千餘里之地屬彼洲乎屬此洲乎譬之剖中原爲南北圖南朝者則以黃河爲界圖北朝者則以江淮爲界畢竟此江北河南數千里屬南乎屬北乎地中海本非西海特以亘二域之中袤將萬里闊二三千哩與西海相灌輸卽後漢書大

秦條支二國所隔之西海是古書所言西海皆卽地中海也。旣知有大西海環其外而反指地中海南北爲二洲不蹈漢人故轍乎。至墨利加四面環海地數萬里洵別爲一大洲。惟不得以其中央地狹而判之爲二。與前圖同弊。西人旣尋得墨利加之後復念地爲圓體更西應亦可至東。因更航海西尋數年復得南極下墨瓦蠟之地。因并南北墨利加爲一洲。而以新得之地爲第五洲。然未嘗測其南極高距之度數。江河入海之津口衣冠人物之形狀以告天下。後世第言平原滂蕩螢火星

流則尙未晤一人雖至其地與未至等故佛經所謂四大洲者西人止得其二而餘未之聞焉或曰此二洲者於釋典四洲當爲何洲曰阿細亞歐羅巴利未亞共爲南贍部洲也南北墨利加則爲西牛貨洲也梵典言贍部洲中有四主東人主卽震旦南象主卽印度北馬主卽蒙古哈薩克西寶主卽大小西洋是歐羅巴利未亞皆屬贍部洲之明證至北具盧洲則隔于北冰海故海船無達北海而歸之事東神勝洲則阻于南冰海故西船雖能至南極左右覩其地而不能遇其人南懷仁坤

輿圖說顧闕釋典四洲之誼謂南洲當在赤道溫帶以下不當以贍部爲南洲是蓋泥南極北極爲南北不知釋氏以北極南極分上下而以前後左右爲四方同于儒家六合之誼其謂天頂爲北者乃中土人一方斜睨之見其實天頂辰極豈徧于北又安得以南極爲南乎釋典又名四洲曰南閻浮提西瞿耶尼州東弗婆提州北鬱單越州故起世經言南閻浮提日正中時東弗婆提日則始沒西瞿耶尼日則初出北鬱單越正當夜半易地亦然又閻浮提州所謂西方瞿耶尼州以爲東方瞿耶尼州所謂西方鬱

單越州以爲東方鬱單越州所謂西方弗婆提州以爲東方弗婆提州所謂西方閩浮提州以爲東方南北亦然樓炭經云日繞須彌山東方日出南方夜半西方日入北方日中如是右旋更爲晝夜釋典四大洲之誼如是釋典四方之誼如是請以告西洋之分二大洲爲四爲五者并以告西洋之泥南北二極爲南北者

問釋典言佛降生必于大地之中故印度據南洋小西洋之間釋氏皆以印度爲中國他方爲邊地西印度爲天主所生之如德亞及回教主所生之天方國皆居阿

細亞州之西利未亞州之東夾南海地中海之際故天主教則以如德亞爲中國而回教以天方國爲中國其尊西印度如佛教尊中印度等是二洲適中之地自古異人所挺生然謂居二洲東西之中可也其地皆偏瀕南海烏得爲全洲之中曰釋典不言居贍部之中而言居大地之中則是據南北二極言之二極之中爲赤道近二極皆爲冷帶稍離極爲溫帶正當赤道下爲熱帶南洋各國正當赤道下距南北極度數皆均等其地終年恒澳是則正當地球南北之中又正當贍部洲東西

之中故彼自命爲中國也使專據贍部洲言之則正中莫如蔥嶺而環蔥嶺左右古今但爲游牧部落不聞產一英傑何耶故曰東海有聖人出焉西海有聖人出焉聖人之出必在海濱扶輿磅礴之氣必至平原近海如雍冀青兗而後剛殺始盡冲和始鍾惟是印度正當熱帶地過炎燠人多裸袒而震旦則正當溫帶四序和平故自古以震旦爲中國謂其天時之適中非謂其地形之正中也西洋溫帶之地則爲地中海所占而歐羅巴亦偏于冷帶利未亞亦偏于熱帶故儒佛回教天主教

皆生阿細亞洲天文算法奇器亦皆創自阿細亞而後
 流被於歐羅巴洲至利未亞洲之腹地周萬餘里萬山
 環之不與他國往來故雖以麥西國亞毘心域國之聲
 名文物亦不通中國而西洋市舶所至則僅其邊隅黑
 奴烏鬼之區而已是則又以瀕海為糟粕腹內為精英
 地不靈者人不傑信哉小西洋利未亞洲瀕海之地多
產黑人歐羅巴商舟過之多買
 為奴供役使明史謂之烏鬼今沿其稱呼西洋為鬼子
然白夷與黑夷各產各地相去數萬里豈惟非一國并
非一洲今謂黑奴為烏鬼何也
 并謂白夷為白鬼則大不可至南北墨利加洲地廣
數萬里與瞻部洲同其大明代始與瞻部相通而自明

以前其洲中數千載不過草木蕃殖游牧射獵竟無創
教治世之聖人及各國開墾通商始知有天方天主等
教釋典言佛出世必在浮提州其三州皆無佛乃竟並
天主天方之教而無之則贍部洲爲四洲之冠何疑焉
歐羅巴利未亞皆奉天主天方之教而天主天方并產
西印度佛教則產中印度與儒教產震旦相等而歐羅
巴未聞產一教主則贍部洲內又以阿細亞冠彼二洲
何疑焉

墨利加洲當爲釋典之西牛貨州非臆度也坤輿圖說

職方外紀言墨利加州之孛露國金加西臘國地出金銀天下稱首百物皆貴惟銀至賤其礦有四坑役者常三萬人國王什取其一七日約得課三萬而貿易通志言北墨利加州之麥西可國有金銀廠明萬厯至今銀歲出口者千餘萬圓歲進口貨價千二百萬圓南墨利加州之伯路國卽前之孛露也金銀山最著昔爲西班牙奪據歲出銀數百萬至千萬圓不等近日國人恢復自治開鑛日旺又云當明嘉靖時西洋聞此金山銀嶺之名于是西班牙葡萄牙國以兵奪據其地所獲無算金條滿

屋每騎兵各賜二萬圓步兵各賜萬餘圓武官各分數萬圓其後每年所出之數金七百餘萬圓銀千有百餘萬圓有某金廠自開之後所出共計萬萬五千萬圓皆載回西班牙國鑄造番餅廣布天下至今三百年開鑿無窮無盡後因西班牙國兵暴虐孛露人不服起義驅逐自立國王招徠商賈于是英吉利荷蘭之商歲運銀回國約五六百萬圓銀價漸賤貨價漸昂始停止運銀進口俟他日銀價起時再運之以平價然則天下貿易之商莫盛于歐羅巴金銀之產莫盛于墨利加一爲西

方寶主一爲西牛貨洲何疑焉今廣東貿易惟彌利堅
國歲有進口銀四十萬圓而歐羅巴則專以鴉片耗中
國之幣故彌利堅于我有益無損英夷于我有損而無
益

問曰、贖部洲之西方寶主、南方象主、北方馬主、則誠然
矣、人則四方所同、何獨以人主歸之東方、曰、請以西夷
之書徵之、澳門新聞錄曰、中國人民居天下三分之一、
生齒之繁、無國可比、卽如俄羅斯地方、百四十一萬四
千四百方里、戶口不過四千一百九十二萬五千名、而

中國只湖廣一省，廣不過十四萬四百七十方里，已有戶口四千五百零二萬名。江南地方九萬二千九百方里，戶口卽有七千二百萬名。由此觀之，中國只一省卽抵佛蘭西、英吉利、歐羅巴、特厘阿三國之人民。又華事夷言曰：中國繁庶，甲乎四海。但卽廣東一省之人，可敵他方十餘國。各國皆地廣人稀，卽印度戶口最稠，亦尙有曠土。中國則不惟平地皆田，卽山巔嶺側無不層層開墾，寸壤不遺。其散布于海外各國者，尙不知凡幾。其繁庶誠四海所未有。由是觀之，則東方之宜人信矣。觀

墨利加洲南北數萬里明季歐羅巴各國爭往開之各
闢草萊立城市竟如自古無人之荒島近卽回部之西
四城膏腴可墾者動數萬頃中國有之乎至北方馬主
不特蒙古哈薩克布魯特爲然卽再北而俄羅斯其東
北際海之地亦產名馬以游牧爲生騎射爲俗見異域
錄及本志則馬主之說亦信矣卽其所言衡之則四主
中亦自以人主爲上

問西洋舟船所至止有二洲則釋典此外尙有第三第
四洲信乎曰此外必有二洲不獨釋典言之也卽以西

人所製地球觀之兩洲實止居全地之半自中國日本以東更無大國其海跨越赤道南北周八萬餘里且在溫帶寒暑均平之區尙勝地球北極下冷帶有人之地豈冷帶有人而溫帶反無人乎赤道以南空地亦周七萬餘里其地在南極冷帶者半在溫帶者亦半溫帶以下亦必有國土居民西人遊迹偶至名之曰墨瓦蠟泥加而不能詳其度數形勢豈既有其地而竟無其人乎然則東神勝洲北具盧洲之地卽據地球所餘之空度亦鑿鑿當有二洲又何疑焉惟釋典所云南北東西

四洲實不以二極分南北故自瞻部以外未可指其孰
爲東州孰爲北州

釋昆侖上

昆侖卽蔥嶺蔥嶺卽河源之阿耨達池非弱水條支西

海之地

淮南子十洲記等

非金城臨羌之石室

漢書地理志金城卽臨羌縣西

北有王母石室及弱水昆侖山祠臨羌在今西寧非青

海之大積石

元都實說

非吐番之悶摩黎山

唐人劉元鼎說

亦非後

藏阿里之岡底斯山也

康熙中理藩院主事勝住偕喇嘛繪西藏青海地圖歸奏如此

蓋前之一說由誤混昆侖於須彌次三說由誤執青海

及吐番河爲河源最後一說由誤指阿耨達山在西藏

今不暇言弱水條支之荒誕

辨詳於後

與金城積石悶摩黎

之淺近請先辨岡底斯山康熙時回疆未入版圖奉使刺麻惟知自侈蕃地山水遂以後藏阿里之高山當昆侖當阿耨達謂天下三條四列之山皆祖諸此故番語岡底斯譯言眾山水之根又以其山所出支河譯以馬口牛口象口孔雀口附會於阿耨達四水請先徵其不合一則儒言昆侖釋言阿耨達皆居大地之中今阿里西南徼外之岡底斯山偏近南海絕非域中二則昆侖爲河所源今岡底斯山距青海重出之河源五千餘里距于闐葉爾羌喀什噶爾初出之河源亦三千餘里烏

觀所謂河出昆侖者乎三則阿耨達池出四大水分歸
四大海今岡底斯山東出者惟一檳榔江會大金沙江
入緬甸南海其西出之狼楚麻楚拉楚三水又皆合赴
恒河入南海并無入東海西海北海之水況康秦扶南
傳恒水出昆侖山中有五大源則此後藏入恒河三支
亦非遠源嫡派四則言阿耨達池在山頂非山麓蓋眾
山之太祖必爲眾水之天潢今岡底斯山前面二湖在
麓非頂且不通四面支河安能爲萬水之源五則西北
域記言岡底斯山在烏斯藏西南縣崖峭壁積高凝冰

山巔清泉百道奮湧爭流自巔至麓既見又伏四面如
獅如象如馬如禽西北走喀齊西南走天竺爲各山之
鼻祖然廣袤不及二百里高才五百丈云云是其高大
不及蔥嶺十分之一安能爲宇內最高之山然則昆侖
果安在請十徵之儒籍一徵之釋典一徵之西洋圖說
一徵之本朝紀載而知眾山之祖乃蔥嶺而非岡底斯
山所謂河源出阿耨達者乃蔥嶺脊上之大龍池回語
謂之哈喇淖爾果爲四大源所出之昆侖也山海經西
山經曰昆侖之邱寶維帝之下都河水出焉而南流注

於無達赤水出焉而南流注於氾天之水洋水出焉而西南流注於醜塗之水黑水出焉而西流注於大杆又曰西海之南流沙之濱赤水之後黑水之前有大山名曰昆侖之邱是蓋以洋水西流爲注雷翥海之河赤水南流爲注南海之恒河黑水當爲注北海之阿被河惟河水南流爲注中國之黃河吳省蘭河源考以赤水爲喀什噶爾之烏蘭河黑水爲葉爾羌之喀喇河然經文別出河水于三水之外不應復出河源而黑水西流亦乖東注之義證一也史記大宛傳張騫使西域還爲天子言于闐之西水皆西流注西海其東則東流注鹽澤潛行地下其南則

河源出焉。多玉石，鹽澤去長安可五千里。其後漢使窮河源，出于闐其山，多玉石，采來。天子案古圖書，名河所出曰昆侖。考張騫僅至于闐，未至蔥嶺，故有烏覿昆侖之語。而嶺西水皆西流，則已聞諸于闐之人，是亦明以蔥嶺爲昆侖。蓋漢時于闐國大，西有蔥嶺，曷嘗以于闐南山當昆侖耶？南山脊外之水，能入西海。耶水經注引涼土異物志云：蔥嶺之水分流東西，西入大海，東爲河源。卽禹記所謂昆侖。又言蔥嶺在敦煌西八千里。河源潛發其嶺，分爲二水，一出岐沙谷，東流徑無雷，依耐蒲。

犁疏勒皮山莎車各國爲河源一西徑循休難兜闕賓
月氏各國至安息而注雷翥海蔥嶺有國名伽舍羅逝
此國狹小而總萬國之要道無不由其城南是昆侖確
爲河源確居地中分注東西各海證二也爾雅河出昆
侖虛色白所渠并千七百一川色黃今星宿海甫出卽
燦若黃金安得色白安有渠并安得爲昆侖之虛惟蔥
嶺河源銀濤練浪西域水道記曰登阿賴山顛望
大龍池銀濤一片上涵天光而其
所并千七百渠者卽回部所受千百支幹之水皆在未
至蒲昌海星宿海以前是爾雅色白指蔥嶺之源色黃

指星宿海之源知河源爲昆侖尤必知河所初出之源爲真昆侖證三也爾雅又言西北之美者有昆侖虛之

璆琳琅玕焉今蔥嶺產美玉

見元劉郁西使記

環蔥嶺之葉爾

羌和闐溫都斯坦皆出美玉詎青海所有詎岡底斯山所有證四也漢書西域傳河有兩源一出蔥嶺一出于闐于闐在南山下其河北源與蔥嶺河合東注蒲昌海一名鹽澤其水亭居冬夏不增減潛行地下南山積石爲中國河按蒲昌海卽今回疆之羅布淖爾受和闐河及蔥嶺南北河是爲二源蔥嶺南河出葉爾羌山中蔥

嶺北河則出喀什噶爾西千餘里之大龍池是爲黃河最遠之正源故史記引禹本紀言河出昆侖其高二千五百里其上有瑤池瑤池卽大黑龍池也出蔥嶺者其正源出和闐者其旁源蔥嶺河經喀什噶爾東會葉爾羌河又東始會于闐河源流廣大視和闐河數倍和闐兩岸沙積水多澗滲而蔥嶺源數千里或分或合不滲於沙不隔於嶺自古數河源必於此則推昆侖者必於此雖于闐之旁源尙不敢並況他說乎證五也山海經華山七千七百六十七里曰不周之山東望勃澤河水

之所潛也其源渾渾泡

水經注稱鹽澤之水洞澗電轉為陰淪之脈卽渾泡之謂

郭注泐澤卽鹽澤山形有缺不周匝處因名不周蓋蔥

嶺左幹爲天山右幹爲南山包回疆西南北三面惟缺

東面形如半規而虛其中河源蒲昌海出焉是則蔥嶺

卽昆侖卽不周之山故淮南子稱不周之山爲天柱而

七千七百餘里正蔥嶺距華山之里數證六也

吳省蘭河源考

曰西域大勢四降中窪而羅布淖爾適當其窪處凡蔥

嶺之東嘉峪關之西天山之陽南山之陰縱橫數千里

一涓一滴於是匯歸惟以東南方一隅爲泐水之尾閘

雖流沙間隔于里而水不流行于沙面必貫輸于沙底

雖無顯赴之蹟可戾其潛發之源魏游雅曰易言天與水違行今自蔥

嶺以西水皆西流則易之所及蔥嶺以東耳說文正上之高也從北從一一地也人居正南故從北中邦之居在昆侖東南是則昆侖正爲地之主名故說文以正屬昆侖若岡底斯山則在中國之西南而中國在其東北與說文中邦在昆侖正南不合矣證七也昆侖眾山太祖故十洲記云昆侖有四角大山爲其支輔岡底斯山乃其南幹之大宗但可謂由蔥嶺南轉而爲岡底斯山反由岡底斯而發蔥嶺何者山之所趨水亦從之如果山脈自後藏趨北轉西至回部而爲蔥嶺則其水皆應

從山脈北流何故後藏之瀾滄江之怒江之龍川江之
大金沙江皆由雲南經緬甸安南以入南海無一北流
之水乎是知岡底斯山特蔥嶺南幹之主峯而蔥嶺北
幹則循塞垣趨朝鮮濊貊與鄂羅斯分界南幹則包烏
斯藏滇粵盡於緬甸暹羅與五印度分界故漢書西域
三十六國惟在蔥嶺東者皆屬都護而蔥嶺以西無之
哉 朝聲教所訖亦以蔥嶺爲斷雖元代初年盡吞
蔥嶺以西各國分建藩封卒皆尾大鞭長不受控制豈
獨兵力不逮亦天地大氣之自爲界限歟證九也元史

郭寶玉傳太祖征西域入鐵山屯大雪山前谷中雪深
 二丈乃禱山川神封昆侖爲元極王大鹽池爲惠濟王
 劉郁西使記逾別石蘭過忽牽河土人言黃河源出南
 大山地多產玉疑爲昆侖是元人亦明知葱嶺河源爲
 昆侖證十也更徵釋典言昆侖卽阿耨達山者始于康
 泰扶南傳及佛圖調傳并見水經注阿耨言阿耨達池
達亦名無熱丘出四大水注四大海者見於長阿含經經云雪山頂上
有阿耨達池縱
 廣五十由旬池東有恒伽河從牛口出從五百河入東
 南海池南有新頭河從師子口出從五百河入西南海
 池西有博叉河從馬口出從五百河入西北海及唐僧
 池北有斯佗河從象口出從五百河入東北海

元奘西域記

記曰瞻部洲之中地者阿那婆答多池也
卽阿耨達在香山之南天雪山之北周八

百里西出縛芻河入西北海南出新度河入西南海東
出苑伽河入東南海北出徙多河徙多河潛流地下出
積石山爲中國河源阿那婆答卽阿耨達
之轉音新頭河新度河皆印度河之轉音而華嚴音義

述之曰香山頂上有阿耨達池四面各流出一河東面

斯陀河出金剛師子口南面恒伽河出銀象口西面信

度河出金牛口北面縛芻河出琉璃馬口而阿耨達池

所在則西域記徵之曰自商彌國境東北踰山七百餘

里至波密羅川川東西千餘里南北百餘里狹隘之處

不踰十里據兩雪山間川中有大龍池東西三百餘里

南北五十餘里，據大蔥嶺內，當瞻都洲中，其地最高也。

其水澄清甘美，池東派一大水東流，東北至疏勒國，西

界與徙多河合而東。漢疏勒國唐之佉沙國今喀什噶爾也徙多河已見前西北

一大流與縛芻河合而西，至達摩諦悉國。按徙多河即斯他河縛芻

河即博叉河新頭河即信度河一名印度河即恒河正源也印度河復中分二流為東西兩恒河同注南海別

詳印度恒河考縛芻河則西流正支其達摩諦悉國即今蔥嶺西之什克南部也惟人北海之阿被河雖出蔥

嶺北幹而不出龍池故淮南子有黃水三周復所之說蓋重源潛發猶羅布淖爾之發為星宿海唐人不知此

義故強以縛芻河為北注而以印度河為西注辨見恒河考此乃直指蔥嶺脊上之

大龍池為阿耨達池，即唐元奘取經歸途溺象之地。元奘

還至于闐國上表云今已越蔥嶺渡波密羅川亦即僧

惠生至蔥嶺頂盤陀國見春水西流之地洛陽伽藍記

步漸高四日至頂約半天矣漢盤陀國正在山頂蔥嶺

即唐書西域傳所指熱海之地唐書蔥嶺水南流者經

胡地入于海北三日行度雪海由勃達嶺北行羸千里

得細葉川東曰熱海地寒不凍川長千里自此抵西海

矣亦即元太祖軍至雪山禱神封祭之地見前元史條下亦即

乾隆中官兵追霍集占未至拔達克山沿岸鏖戰之地

乾隆二十四年回會霍集占將投拔達克山官軍追至

哈喇淖爾遙望五六十里外有塵起越二日追及於和

什克珠庫嶺蓋自池東追至池西也拔達克山近古屬

賓國道有三池盤石阪臨崢嶸不測之深即經此龍池

也北史波知國有三池大者龍王中者龍婦小者龍子行人投祭乃過亦卽此也 亦卽道光初

官兵追張格爾至阿賴山頂望春水西流之地阿賴在

牧地在蔥嶺春漢盤陀國也追張格爾事見阿賴池聖武記登阿賴望龍池見西域水道記知阿耨池

則知河源知河源則知昆侖據大地之中當萬國孔道

且匯巨浸于萬仞峯顛分注四大海宇內斷無其匹番

語黑曰哈喇池曰淖爾以水色青黑得名黑龍池之稱

阿耨達與稱哈喇淖爾華梵翻切皆同阿達卽哈喇之

殊非若岡底斯之音義睽隔且西番語謂雪爲岡梵語

雪爲底斯合番梵皆謂雪山無謂山水根之訛審音辨

物其將安從蔥嶺亦名雪山亦名香山而西域記則稱

之幹為香山故釋迦氏譜引閻浮圖有蔥嶺西據香山

之說其東出二幹一為回疆北路之天山一為和闐之

南山而南北二山皆可稱雪故西域記有蔥嶺據兩雪

山問之語蓋對文則別散文則通坤輿圖說有高八十

里之哩弗依山在蔥嶺以西鄂羅斯

境內其高次於蔥嶺當即香山矣

起于是十洲記及河圖玉版等書混昆侖於須彌以海

水遶之為弱水環之昆侖既不若是之大後世若唐楊

松筠以須彌為四大幹山之祖則又混須彌於昆侖須

彌又不若是之小西域聞見錄疑温都斯山迤西大豈

知釋典起世經言須彌為四洲地之中心昆侖為閻浮

提之中心是梵書言須彌者地頂也地心上值天頂正北極下半年爲晝夜之地故言日月繞須彌其外大海環之於海中有四大洲而昆侖特南贍部洲中之高山乃須彌南面之一隅烏得以當全地之須彌哉是釋典以昆侖爲南贍部洲之中央卽阿耨達山與河圖括地象所稱地中央曰昆侖其東南萬五千里曰神州之說合與穆天子傳昆侖去宗周淵源萬有一千里之數亦合山海經地東西二萬八千里南北二萬六千里自積石千七百四十里自積石出隴西郡至洛準地志可

五千餘里又穆天子傳天子自昆侖山入于宗周乃里
西土之數自宗周灑水以西至于河宗之邦陽紆之山
三千有四百里自陽紆西至河首四千里合七千四百
里又昆侖瑤池去宗周萬一千一百里此并以蔥嶺爲
昆侖故里數信而有徵非同他書五萬里七萬里十萬
里四十六萬里之異說酈道元顧不信而信東方朔淮
南子等書幻等蜃市誕擬蓬壺豈性儒書所不合抑釋
典所不屑道西洋疇人所不屑譚何者南懷仁坤輿圖
說宇內名山凡九自西洋高十三里之山起愈東則愈

高有高二三十里者，有高四十餘里者，有高八十餘里者，其末最高之山名曰高駕所山，在阿細亞洲境內，高

百有三十里。

詳見本志總論第四十六卷

夫中華在蔥嶺之東，則山

脈自西來，愈西愈高，高至蔥嶺而止，西洋在蔥嶺西，則

山脈自東往，愈東愈高，亦高自蔥嶺而始，山居東西正

中，雖譯名不同，而宇內高山，獨推亞細亞洲爲歐羅巴

洲，各山所不及，謂非蔥嶺而何以萬山之祖，當萬國之

中，謂非昆侖而何，更徵以本朝掌故，乾隆四十七年遣

使窮河源歸

詔曰：史記漢書皆言于闐之西，水皆

西流注海其東流注鹽澤潛行地下南出爲河源今回部諸水皆濳蒲昌海伏地千里至青海而始出立猶濟水之三伏三見則昆侖當在回都之西距此萬里康熙中錫拉尋河源歸奏言貴德堡西有三支河名昆都侖蒙古謂橫爲昆都倫言有三橫水入於河也然則回部所謂昆侖山者亦當爲橫嶺而不當如元都寶壘青海之昆都侖河爲回部之昆侖山至矣哉 聖智周六合 聖訓炳萬古如赫曦之裕蒙蒼自後皇清通志及松筠西陲總統事略皆本斯誼曰黃河近源在星宿

海西三百餘里遠源則爲回部極西之蔥嶺在喀什噶爾葉爾羌西千餘里蒙古謂天山冰嶺皆名曰昆都侖急呼則曰昆侖云云雖語焉不詳要之昆侖當爲蔥嶺非青海非吐番後藏固已折衷 大聖誕告中外使

康熙世回部早同車書則

聖祖是論固當先

高宗而發之昔之有天下者疆域褊狹多不能有昆侖能有昆侖能知昆侖爲河源者皆自我 大清高宗純皇帝始而拘墟瞽儒猶或泥於康熙朝論定未有知蔥嶺河源之後說者豈以前說於阿耨達池附會較詳

而後說未之及歟。謹勾稽本末，具圖及說，繹闡
聖人先後同揆之義。軒軒並揭天地，又以謂
國家撫有西域，主名山川，列正祭，隨祭者十有六，不當反遺
昆侖太祖，非所以母元氣，綱萬靈，符古者祭海先河之
誼。

釋昆侖下

問曰：昆侖之爲蔥嶺，龍池之爲阿耨達信已。顧釋典言
四水分注四海，而今考元奘西域記，與徐氏西域水道
記圖，則龍池所出，實止三水，東爲中國河源，南爲恒河。

印度河同源西爲縛芻河源唐人欲合佛經四水故以
印度河當西注以縛芻河當北注今子謂印度河卽西
恒河與東恒河同源分注南海無西注之蹟然則縛芻
一河將分注西北兩海耶又佛經言阿耨達四水皆云
遶池一匝從五百河入于大海後人襲其說謂河源遶
昆侖西北及南而後東流者官書駁之謂昆侖大山非
島嶼比河安能遶其西北南三面而復折東以行耶曰
是說也惟淮南子得之曰昆侖有疏圃之池河水出其
東北陬赤水出其東南陬洋水出其西北陬黃水三周

復其源凡此四水地之神靈以運萬物是明言昆侖流出者惟三水河水即黃河赤水即恒河洋水即縛芻河其一則伏流潛發猶水經述蒲昌海涸湍電轉為隱淪之脈者其為阿被河之潛脈無疑職方外紀及南懷仁圖曰阿被河源一出大布里山即蔥嶺北一出基臺湖即宰桑泊北注冰海首尾七千二百里河凍開時有大冰如山岳衝擊兩岸旁溢千二百里土人遷居入山避之蓋蔥嶺北幹為烏拉嶺其嶺西北有帕付林高山峙出諸山之上冬夏積雪人不能至即大布里山也其低平處

高不過三百丈而長則自北海至裏海為阿細亞歐羅

巴二洲之界亦為俄羅斯東北藩屬之界距阿爾泰山

起處不遠四洲志山巔嶺上隨處流泉雖最高處亦甚泥

濘其嶺東出烏拉河托波爾河俱東北歸厄爾齊斯河

入北海異域錄案烏拉嶺隨地流泉沮洳泥濘即潛源重

發同于星宿海之證故懷仁圖說謂大布里山在俄羅

斯境內案四洲志稱烏拉嶺異域錄稱佛落克嶺

出之河以蓋嶺東出烏拉河嶺西出佛落克河故各據所嶺西之水下流會佛爾格河一作窩爾加其水不

北流而南注八騰吉斯海土爾扈特游牧其地稱之曰

厄濟爾河

異域錄

又賽馬爾罕之納林河亦自東南來會

之是則蔥嶺以西更無北注之水其北注者惟烏拉嶺
東之厄爾齊斯河爲北流第一大幹故懷仁圖說列阿
被河于阿細亞洲不列于歐羅巴洲也蓋縛魯河出池
以後始匯于雷翥海而後再出潛源阿被河則不出池
卽伏流地下發于烏拉嶺爲潛源觀此而淮南三周復
所之義明而佛經阿耨達四水皆遶池一匝之誼亦明
矣山海經言昆侖之邱出河水赤水洋水黑水與淮南
同惟易黃水爲黑水考蒲昌洶水青黑重發于星宿川

則黃。以此例阿被河，蓋淮南預指其重源，故黃之山海經惟據龍池之初源，故黑之也。唐代諸僧求北注之水于葱嶺以西，而不得，于是強印度河爲西流，強縛芻河爲北注，姑無論恒河誣謬與佛經不合，試問縛芻河之水果何歸宿耶？夫縛芻河爲龍池西出之正流，卽水經注所謂有媯水潛發蔥嶺西，逕循休難兜闕賓國北，月氏安息國南，與蜺羅歧肅水同注雷蓄海者也。卽元史之阿母河亦作暗布河，亦作阿梅河，元設行中書省以控制西域者也。亦卽南懷仁坤輿圖入鹹海之阿書河。

其上游曰亞被亞河曰亞母湖者也阿母阿書即縛芻之音轉其水

右並葉河葉河出蔥嶺北原西北流逕石國康國米國

圖何國史國等地見大唐西域記一作素葉川即今納林河逕敖罕

西哈薩克入鹹海者左受烏澹河逕吐賀羅月支國後見

漢書新唐書即水經注之蜺羅歧禘水出阿耨達山之

北西逕紉尸羅國四大塔犍陀衛國至安息注雷菑海

者雷菑海即裏海一名鹹海一名北高海一名加土比

名達里凡蔥嶺東之水皆瀦蒲昌海即羅布蔥嶺以西

之水皆瀦鹹海蒲昌海之水伏流潛發于星宿海為黃

河以入東溟則裏海之浩蕩淵滄斷無永瀦而不發之
理故嘗謂裏海以西之大乃河長二千四百里分三道
入罌阿的湖以達地中海者當爲裏海潛源重出之河
是縛芻河爲西注正朝而唐僧之強印度河爲西注又
強縛芻河爲北注者萬不可通矣蓋蔥嶺北幹曰烏拉
嶺橫抵北海故蔥嶺以西之水爲烏拉嶺所包皆不北
注而西南入裏海其北注者惟蔥嶺東北之阿被河潛
源重發一發于烏拉嶺一發于宰桑泊皆匯歸厄爾齊
斯河卽阿被阿也一作阿比後人縱或知阿被河卽厄爾齊

斯河又以其不顯出阿耨達池而疑之又或不知厄爾

齊斯河有兩源但知其出宰桑泊即基臺湖而不知其

出烏拉嶺者即大布里山即蔥嶺北幹又或泥南懷仁

圖繪賽馬爾罕于基臺湖之上則益疑之此西圖之大

罕在蔥嶺西其下游夫古者九能之士山川能說其非

徒說形勢分合之謂其必察地理脈水性并其卓詭之

狀隱潛之絡而瞭知之昆侖阿耨達之三周遶匝使不

一證諸淮南子再證諸水經注之蒲昌海三證諸烏拉

嶺之隨處流泉沮洳泥濘其不供下士大笑者幾希濟

水絕河而南三伏三見使不出中國而傳自外夷其不

斥為誕罔者幾希或曰黃水三周復其源此蓋非淮南

升于昆侖觀黃帝之宮釋氏西域記阿特大山其上有

大淵水宮殿樓觀甚大焉是昆侖有黃帝遺蹟自非乘

龍御天之大聖孰能智期六合若此者乎又西域記蔥

嶺南接雪山北至熱池干泉干泉者地方二百餘里南

面雪山三垂平陸即今伊犁河所西匯之巴勒喀什泊

也蔥嶺得名以西域記山嶺蔥翠之說為正顏師古謂

產野蔥陋不足辯至南懷仁等皆謂裏海之水浩蕩甚

鹹不通外海獨海國聞見錄言裏海之水流包社不

知何據豈誤以印度河出自裏海乎置之不論可矣

海國圖志卷七十五

國地總論中

原無
今補

邵陽魏源輯

利瑪竇地圖說

地與海本是圓形而合爲一球居天球之中形如鷄子黃在青內有謂地爲方者乃語其定而不移之性非語其形體也天既包地則彼此相應故天有南北二極地亦有之天分三百六十度地亦同之天中有赤道自赤道而南二十三度半爲南道赤道而北二十三度半爲北道按中國在北道之北日行赤道則晝夜平行南道

則晝短行北道則晝長故天球有晝夜平圈列於中晝短晝長二圈列於南北以著日行之界地球亦設三圈對於下焉但天包地外爲甚大其度廣地處天中爲甚小其度狹此其差異者耳查得直行北方者每路二百五十里覺北極出高一度南極入低一度直行南方者每路二百五十里覺北極入低一度南極出高一度則不特徵地形果圓而並徵地之每一度廣二百五十里則地之東西南北各一周有九萬里實數也是南北與東西數相等而不容異也夫地厚二萬八千六百三十

六里零百分里之三十六分上下四旁皆生齒所居渾
淪一球原無上下蓋在天之內何瞻非天天總六合內
凡足所伫卽爲下凡首所向卽爲上其專以身之所居
分上下未然也且予至大西浮海入中國至晝夜平線
見南北二極皆在平地略無高低稍轉而南過大浪山
已見南極出地三十六度則大浪山與中國上下相爲
對待矣而吾彼時只仰天在上未視之在下也故謂地
形圓而周圍皆生齒者信然矣以天勢分山海自北而
南爲五帶一在晝長晝短二圈之間其地甚熱帶近日

輪故也。二在北極圈之內，三在南極圈之內，此二處地
居甚冷，帶遠日輪故也。四在北極晝長二圈之間，五在
南極晝短二圈之間，此二地皆謂之正帶，不甚冷熱，日
輪不遠不近故也。又以地熱分輿地爲五大洲，曰歐羅
巴、曰利未亞、曰亞細亞、曰南北亞墨利加、曰墨瓦蠟泥。
加若歐邏巴者，南至地中海，北至臥蘭的亞及冰海，東
至大乃河，墨何的湖，大海西至大西洋，若利未亞者，南
至大浪山，北至地中海，東至西紅海，仙勞冷祖島，西至
河摺亞諾海，此州只以聖地之下微路，與亞細亞相聯。

其餘爲四海所圍若亞細亞者南至蘇門答臘呂宋等島北至新增白蠟及北海東至日本島大明海西至大乃河墨阿的湖大海西紅海小西洋海若亞墨利加者全爲四海所圍南北以微地相連若墨瓦蠟泥加者盡在南方惟見南極出地而北極恒藏焉其界未審何如故未敢訂之惟其北邊與大小瓜哇及墨瓦蠟泥峽爲境也其各州之界當以五色別之令其便覽各國繁夥難悉大約各州俱有百餘國原宜作圓圖以其入圖不便不得不易圖爲平反圈爲線耳欲知其形必須相合

聯東西二海爲一片可也其經緯線本宜每度畫之今且以每十度爲一方以免雜亂依是可分置各國於其所東西緯線數天下之長自晝夜平線爲中而起上數至北極下數至南極南北經線數天下之寬自福島起爲一十度至三百六十度復相接焉試如察得南京離中線以上三十二度離福島以東一百二十八度則安之於其所也凡地在中線以上主北極則實爲北方凡在中線以下則實爲南方焉釋氏謂中國在南瞻部洲並誣須彌山出入地數其謬可知也

案西法以北極爲北南極爲南此天

之南北非地之南北也釋典則以北極爲地頂而東西南北四面環之與南極北極無涉蓋北極爲上南極爲下是上下非四方也又用緯線以著各極出地幾何蓋地離晝夜平線度數與極出地度數相等但在南方則著南極出地之數在北方則著北極出地之數也故視燕京隔中線以北四十度則知燕京北極高四十度也視大浪山隔中線以南三十六度則知大浪山南極高三十六度也凡同緯之地其極出地數同則四季寒暑同態焉若兩處離中線度數相同但一離於南一離於北其四季并晝夜刻數均同惟時相反此之夏爲彼之冬耳其長

晝長夜離中線愈遠則其長愈多。余爲式以記於圖邊。每五度其晝夜長何如。則西東上下隔中線數一則皆可通用焉。用經線以定兩處相離幾何辰也。蓋日輪一日行一周則每辰行三十度。而每處相違三十度。並謂差一辰。故視黑龍江離福島一百四十度。而緬甸離一百一十度。則明黑龍江於緬甸差一辰。而凡黑龍江爲卯時。緬甸方爲寅時也。其餘倣是焉。設差六辰。則兩處晝夜相反焉。如所離中線度數相同。而差南北。則兩地人對足底。反行故南京離中線以北三十二度。離福島

一百二十八度而南亞墨利加之瑪八作離中線以南
三十二度離福島三百二十八度則南京於瑪八作人
相對反足底行矣從此可曉同經線處並同辰而同時
見日月蝕矣此其大略也其詳則備於圖云

艾儒略五大州總圖略度解

天體一大圓也地則圓中一點定居中心永不移動蓋
惟中心離天最遠之處乃爲最下之處萬重所趨而地
體至重就下故不得定居於中心稍有所移反與天
體一邊相近不得爲最下處矣古賢有言誠使掘地可

通以一物縋下至地中心必止其足底相對之方亦以一物縋下至地中心亦必止可見天圓地方乃語其動靜之德非以形論也地既圓形則無處非中所謂東西南北之分不過就人所居立名初無定準地度上與天度相應天有南北二極爲運動樞兩極相距之中界爲赤道平分天之南北其黃道斜與赤道相交南北俱出二十三度半日躔黃道一日約行一度自西而東奈爲宗動天所帶是以自東而西一日一周天耳日輪正交赤道際爲春秋二分規南出赤道二十三度半爲冬至

規北出赤道二十三度半爲夏至規黃道之樞與赤道之樞亦相離二十三度半其周天之度經緯各三百六十地既在天之中央其度悉與天同如赤道之下與兩北二極之下各二十三度半也又二極二至規外四十三度也分爲五帶其赤道之下二至規以內此一帶者日輪常行頂上故爲熱帶夏至規之北至北極規冬至規之南至南極規此兩帶者因日輪不甚遠近故爲溫帶北極規與南極規之內此兩帶者因日輪止照半年故爲冷帶赤道之下終歲晝夜均平自赤道以北夏至

晝漸長有十二時之晝有一月之晝有三月之晝直至北極之下則以半年爲一晝矣往南亦然以南北距度考之其熱不得不然也其在東西同帶之地凡南北極出入相等者晝夜寒暑節氣俱同但其時則有先後或差一百八十度則此地爲子彼地爲午或差九十度則此地爲子彼處爲卯餘可類推也人居赤道之下者平望南北二極離南往北每二百五十里則北極出地一度南極入地一度行二萬二千五百里則見北極正當人頂出地九十度而南極入地九十度正對人足矣從

南亦然此南北經度也至于東西緯度則天體轉環無定不可據七政量之隨方可作初度而天文家又立一法算之以宗動天一周則日月行三百六十度故每時得三十度如兩處相差一時則東西便離三十度也今兩處觀月食各自不同則知差一時者其地方相離三十度以此推之東西之度可考驗矣或但以里數考之古來地理家俱從西洋最西處爲初度卽以過福島子午規爲始仿天度自西而東十度一規以分東西之度故畫圖必先畫東西南北之規後考本地理離赤道之

南北福島之東西幾何度數乃置本地方位譬如中國
京師先知離赤道以北四十度離福島以東一百四十
二度卽于兩經緯線相交處得京師本位也但地形旣
圓則畫圖于極圓木毬方能肖像如畫于平面則不免
或直剖之爲一圖或橫截之爲兩圖故全圖設爲二種
一長如卵形南北極居上下赤道居中一圓如盤形南
北極爲心赤道爲界又于一全圖外另各設爲一圖曰
亞細亞曰歐羅巴曰利未亞曰亞墨利加也而墨瓦蠟
厄加則國土未詳圖不另立云圖中南北規度相等皆

以二百五十里爲一度赤道之度亦然其離赤道平行東西諸規則漸近兩極者其規漸小然亦分爲三百六十度其里數以次漸狹別有算法今畫圖爲方者其畫線不免于稍變畢竟惟圓形之圖乃得其真也

艾儒略四海總說

造物主之化成天地也四行包裹以漸而堅凝故火最居上而火包氣氣包水土則居於下焉是環地面皆水也元黃始判本爲生人水土未分從何立命造物主於是別地爲高深而水盡行於地中與平土各得什五所

瀦曰川曰湖曰海川則流湖則聚海則潮川與湖不過水之支派而海則眾流所鍾稱百谷王焉故說水必詳於海海有二焉海在國之中國包乎海者曰地中海國在海之中海包乎國者曰寰海川與湖佔度無多不具論寰海極廣隨處異名或以州域稱則近亞細亞者謂亞細亞海近歐羅巴者謂歐羅巴海他如利未亞如亞墨利加如墨瓦蠟尼加及其他叢爾小國皆可隨本地所稱又或隨其本地方隅命之則在南者謂南海在北者謂北海東西亦然隨方易向都無定準也茲將中國

列中央則從大東洋至小東洋爲東海從小西洋至大
西洋爲西海近墨瓦蠟尼一帶爲南海近北極下爲北
海而地中海附焉天下之水盡於此裨海大瀛屬近荒
唐無可證據

海雖分而爲四然中各異名如大明海太平海東紅海
孛露海新以西把尼亞海百西爾海皆東海也如榜葛
蠟海百爾西海亞刺比海西紅海利未亞海何措亞諾
滄海亞大蠟海以西把尼亞海皆西海也而南海則人
跡罕至不聞異名北海則冰海新增蠟海伯爾昨客海

皆是至地中海之外有波的海窩窩所德海八爾馬泥海大海北高海皆在地中可附地中海

海島之大者附載各國之後其小者不下千萬難以盡

述大率在亞細亞者蘇門答蠟日本淳泥最大在歐羅

巴者諳厄利亞最大

即英吉利國

在利未亞者聖老楞佐島

最大在亞墨利加者小以西把尼亞最大在墨瓦蠟尼

加者新爲匿亞最大而太平洋海中則有七千四百四十

島此外有石礁或見水面或隱水中水中者船極畏之

又有沙渚船值之則陷此時盡棄船中重貨雖百萬金

錢所不恤，乘潮至方得脫之，否則斷無出理。地心最爲重濁，水附於地，到處就其重心，故地形圓而水勢亦圓，隔數百里水面，便如橋梁，遠望者不可見，須登桅望之，乃見其前或夷或險，而海中夷險各處不同。惟太平海極淺，亘古至今無大風浪，大西洋極深深十餘里，從大西洋至大明海四十五度以南，其風常有定候，至四十五度以北，風色便錯亂不常，其尤異者在大明東南一隅，常有異風變亂，凌雜倏忽，更三十四向，海船惟任風而飄，風水又各異道，如前爲南風水必北行。

儵轉爲北風而水勢尙未趨南舟莫適從因至摧破至小西洋海潮極高大又極迅急平地頃刻湧數百里海中大船及蛟龍魚鼈之屬嘗乘潮勢湧入山中不可出歐羅巴新曾蠟利夫亞大浪山亦時起風浪甚險急至滿刺加海無風儵起波浪又不全海皆然惟里許一處以次第興後浪將起前浪已息矣海上雖多有風獨利未亞海近爲匿亞之地當赤道下者常苦無風又天氣酷熱船如至此食物俱壞人易生疾海深不得下碇船大不能用櫓海水暗流及潮湧飄船至淺處壞者多在

於此海水味鹹中有火性又勢常激盪故不成冰至北海則半年無日氣候極寒而冰故曰冰海海船爲冰堅所阻直須守至冰解方得去又苦冰山海中冰塊爲風所擊堆疊成山海船觸之定爲塗粉矣赤道之下則終歲常熱食物水酒至此色味皆變過之卽復如常凡海中之色大率都綠惟東西二紅海其色淡紅或云海底珊瑚所映而然亦非本色也又近小西洋一處入夜則海水通明如火西儒常親見而異之持器汲起滿器俱火光又滴入掌中光亦瑩然可玩後來漸次消滅

儒略輩從歐羅巴各國起程遠近不一水陸各異大都
一年之內皆聚於邊海波爾杜瓦爾國里西波亞都城
候西商官船春發入大洋從福島之北過夏至線在赤
道北二十三度半踰赤道而南此處北極已沒南極漸
高又過冬至線在赤道南二十三度半越大浪山見南
極高三十餘度又逆轉冬至線過黑人國聖老楞佐島
界中又踰赤道至小西洋南印度臥亞城在赤道北十
六度風有順逆大率亦一年之內可抵小西洋至此則
海中多小島險窄難行矣乃換中船亦乘春月而行抵

則意蘭經榜葛刺海從蘇門答蠟與滿刺加之中又經
新加步峽迤北過占城暹羅界閱三年方抵中國嶺南
廣州府此從西達中國之路也若從東而來自以西把
尼亞地中海過巴爾德峽往亞墨利加之界有二道或
從墨瓦蠟尼加峽出太平海或從新以西把尼亞界泊
舟從陸路出字露海過馬路古呂宋等島至大明海以
達廣州然某輩皆從西而來不由東道故其途程經九
萬里也行海晝夜無停有山島可記者則指山島而行
至大洋中常萬里無山島則用羅經以審方其審方之

法全在海圖量取度數卽知海舶行至某處離某處若干里瞭如指掌百不失一

此是初通中國時故迂遠曠且今則火輪往返不過數月

海舶百種不止約有三等其小者僅容數十人專用以傳書信不以載物其舟腹空虛可容自上達下僅留一孔四圍黠水不漏下鎮以石使舟底常就下一遇風濤不習水者盡入舟腹中密閉其孔復塗以瀝青使水不進其操舟者則細縛其身於檣桅任水飄蕩因其腹中空虛永不沉溺船底又有鎮石亦不翻覆俟浪平舟人自解縛運舟萬無一失一日可行千里中者可容數百

人自小西洋以達廣東則用此船其大者上下八層最
下一層鎮以沙石千餘石使船不傾側震盪全藉此沙
石二三層載貨與食用之物海中最難得水須裝淡水
十餘大桶以足千人一年之用他物稱是其上近地平
板一層則船內中下人居之或裝細軟切用等物地平
板之外則虛其中百步以爲揚帆習武遊戲作劇之地
前後各建屋四層以爲尊貴者之居中有甬道可通頭
尾尾後建水閣爲納涼之處以待貴者之游息船兩傍
列大銃數十門以備不虞其鐵彈有三十餘斤重者上

下前後有風帆十餘道梳之大者長十四丈帆闊八丈
水手二三百人將士銃士三四百人客商數百有船總
管一人是西國貴官國王所命以掌一船之事有賞罰
生殺之權又有船師三人厯師二人船師專掌候風使
帆整理器用吹掌號頭指使夫役探測淺水礁石以定
趨避厯師專掌窺測天文晝則測日夜則測星用海圖
量取度數以識險易以知道里又有官醫主一船之疾
病亦有市肆貿易食物大船不畏風浪獨畏山礁淺沙
又畏火船上火禁極嚴蓋千人之命攸係然其起程但

候風色未嘗選擇時日亦未嘗有大失也

海島逸志曰大海之中風

雨晝晦有黑雲一片如斜下垂漸低漸墜至海者則水為之濺洄湖泮遠者無妨近則燒鷄羽放鞭爆而水概水桶皆當謹慎用綿被或用衣服覆蓋不然盡被吸去矣海水味鹹騰而為雨則淡是天地好生之德不可測議者也

海產以明珠為貴則意蘭最上土人取海中蚌置日中晒之俟其口自開然後取珠則珠色鮮白光瑩有大如鷄子者光照數里南海皆剖蚌出珠故珠色黯黯無光有珊瑚島其下多出珊瑚初在海中色綠而質柔輒上生白子土人以鐵網取之出水便堅有紅黑白三色紅

色者堅而密，白黑色者鬆脆，不堪用。大浪山之東北有暗礁水洞，礁出悉是珊瑚之屬，猶睛寶石各處不乏。小西洋更多琥珀，則歐羅巴波羅尼亞有之。沿海三千里皆是蓋，爲風浪所湧，堆積此地。土人取爲器物，龍涎香黑人國與伯西爾兩海最多。曾有大塊重千餘斤者，望之如島，然每爲風濤湧泊於岸，諸蟲魚獸並喜食之。他狀前已具論。海水本皆鹽味，然亦有不假煎熬自凝爲鹽塊者。近忽魯謨斯處有山五色相間，亦純是鹽。土人鑿山石，鑿以爲器，貯食物則不須和鹽，蓋其器已是鹽。

自生鹹味也，又有海樹，太平海內淺處生草，一望如林，蔥菁可愛。